

Anteproxecto do Decreto _/2008, de _, polo que se establece a ordenación e o currículo de bacharelato na Comunidade Autónoma de Galicia.

O Estatuto de autonomía de Galicia, no seu artigo 31, determina que é competencia plena da Comunidade Autónoma galega o regulamento e administración do ensino en toda a súa extensión, niveis e graos, modalidades e especialidades, sen prexuízo do disposto no artigo 27 da Constitución e nas leis orgánicas que, conforme o punto primeiro do seu artigo 81, a desenvolvan.

A Lei orgánica 2/2006, do 3 de maio, de educación, no capítulo III determina que se entende por currículo o conxunto de obxectivos, competencias básicas, contidos, métodos pedagóxicos e criterios de avaliación de cada unha das ensinanzas reguladas pola citada lei.

Así mesmo, establece que lle corresponde ao Estado fixar os aspectos básicos do currículo en relación aos obxectivos, contidos e criterios de avaliación que constitúen as ensinanzas mínimas ás que se refire a disposición adicional primeira, punto 2, letra c, da Lei orgánica 8/1985, do 3 de xullo, reguladora do dereito á educación.

O Real decreto 1467/2007, do 2 de novembro, establece a estrutura do bacharelato e fíxa as súas ensinanzas mínimas.

A finalidade das ensinanzas mínimas é asegurar unha formación común a todas as alumnas e alumnos dentro do sistema educativo español e garantir a validez dos títulos correspondentes, como indica o artigo 6.2 da Lei orgánica 2/2006, do 3 de maio, de educación. A dita formación facilitará a continuidade, progresión e coherencia da aprendizaxe en caso de mobilidade xeográfica.

A Lei orgánica de educación determina que serán as administracións educativas as que establezan o currículo das distintas ensinanzas reguladas pola citada lei, do que formarán parte os aspectos básicos anteriormente indicados.

Os centros educativos, axentes activos no proceso de ensinanza e aprendizaxe, desenvolverán e completarán, se fose o caso, o currículo establecido, respondendo ao principio de autonomía pedagóxica, de organización e xestión, coa finalidade de adecuarse ás características e á realidade educativa de cada un deles.

Os obxectivos xerais do bacharelato defínense para o conxunto da etapa.

Para cada unha das materias que constitúen o currículo fíxanse os obxectivos, os contidos e os criterios de avaliación.

Neste decreto regúlase así mesmo a distribución horaria para cada unha das materias das distintas modalidades.

De conformidade co exposto, por proposta da Consellería de Educación e Ordenación Universitaria, no exercicio da facultade outorgada polo artigo 34 da Lei 1/1983, do 22 de febreiro, reguladora da Xunta e da súa Presidencia, modificada pola Lei 11/1988, do 20 de outubro, e pola Lei 2/2007, do 28 de marzo, do traballo en igualdade das mulleres de Galicia, oídos os ditames do Consello Consultivo e do Consello Escolar e logo de deliberación do Consello da Xunta de Galicia, na súa reunión do día.....,

DISPOÑO

Artigo 1º.- Obxecto e ámbito de aplicación.

Este decreto ten como obxecto establecer a ordenación xeral e o currículo do bacharelato, que será de aplicación en todos os centros docentes que impartan estas ensinanzas no ámbito territorial da Comunidade Autónoma de Galicia.

Artigo 2º.- Principios e finalidade.

1.- O bacharelato forma parte da educación secundaria, na fase postobrigatoria, e ten como finalidade proporcionar ao alumnado a formación, a madurez intelectual e humana, os coñecementos e habilidades que lle permitan incorporarse á vida activa con responsabilidade e competencia así como capacitarse para o acceso á educación superior.

Artigo 3º.- Obxectivos

O bacharelato contribuirá a desenvolver nas alumnas e alumnos as capacidades que lles permitan:

- a) Exercer a cidadanía democrática, dende unha perspectiva global, e adquirir unha conciencia cívica responsable, inspirada polos valores da Constitución española e do Estatuto de Autonomía de Galicia, así como polos dereitos humanos, que fomente a corresponsabilidade na construción dunha sociedade xusta e equitativa e favoreza a sostenibilidade.
- b) Consolidar unha madurez persoal e social que lles permita actuar de maneira responsable e autónoma e desenvolver o seu espírito crítico. Ser quen de prever e resolver pacificamente os conflitos persoais, familiares e sociais.
- c) Fomentar a igualdade efectiva de dereitos e oportunidades entre homes e mulleres, analizar e valorar criticamente as desigualdades existentes e impulsar a igualdade real e a non discriminación das persoas.
- d) Reforzar os hábitos de lectura, estudo e disciplina, como condicións necesarias para aproveitar eficazmente as aprendizaxes así como medio para o desenvolvemento persoal.
- e) Dominar, tanto na expresión oral como na escrita, a lingua galega e a lingua castelá.
- f) Expresarse con fluidez e corrección nunha ou máis linguas estranxeiras.
- g) Utilizar eficazmente e con responsabilidade as tecnoloxías da información e comunicación.
- h) Coñecer e valorar criticamente as realidades do mundo contemporáneo, os seus antecedentes históricos e os principais factores da súa evolución.

Participar de forma solidaria no desenvolvemento e mellora do seu contorno social.

- i) Acceder aos coñecementos científicos e tecnolóxicos fundamentais e dominar as habilidades básicas propias da modalidade de bacharelato elixida.
- j) Comprender os elementos e procedementos fundamentais dos métodos científicos e da investigación. Coñecer e valorar de forma crítica a contribución da ciencia e a tecnoloxía ao cambio das condicións de vida, así como afianzar a sensibilidade e o respecto do medioambiente e a ordenación sostible do territorio, con especial referencia ao territorio galego.
- k) Afianzar o espírito emprendedor con actitudes de creatividade, flexibilidade, iniciativa, traballo en equipo, confianza en si mesmo e sentido crítico.
- l) Desenvolver a sensibilidade artística e literaria, así como o sentido estético, como fontes de formación e enriquecemento cultural.
- m) Utilizar a educación física e o deporte para favorecer o desenvolvemento persoal e social e impulsar condutas e hábitos saudables.
- n) Reforzar actitudes de respecto e prevención no ámbito da seguridade vial.

Artigo 4º.- Acceso

1. Poderá acceder ao bacharelato, en calquera das súas modalidades, o alumnado que posúa algunha das seguintes titulacións.

- a) Título de Graduado en educación secundaria obrigatoria.
- b) Título de Técnico, obtido tras cursar a formación profesional de grao medio.
- c) Título de Técnico deportivo, tras cursar as ensinanzas deportivas de grao medio.

2. Poderá acceder aos estudos do bacharelato na modalidade de Artes o alumnado que estea en posesión do título de Técnico de Artes Plásticas e Deseño.

Artigo 5º.- Estrutura

1. O bacharelato comprende dous cursos académicos que poderán ser cursados polo réxime ordinario ou polo réxime de ensinanzas de adultos, en calquera das súas modalidades: presencial, semipresencial ou a distancia.

2. O alumnado poderá permanecer cursando bacharelato no réxime ordinario, con carácter xeral, un máximo de catro anos, consecutivos ou non.

3. De acordo co establecido no artigo 34.1 da Lei orgánica 2/2006, do 3 de maio, de educación, o bacharelato, cunha finalidade formativa, orientadora e propedéutica, estrutúrase en tres modalidades, que son as seguintes:

- Artes
- Ciencias e Tecnoloxía
- Humanidades e Ciencias Sociais

4. O bacharelato organizarase en materias comúns, materias de modalidade e materias optativas.

5. A modalidade de Artes organizarase en dúas vías, a de Artes plásticas, deseño e imaxe e a de Artes escénicas, música e danza.

6. As modalidades de Ciencias e Tecnoloxía e Humanidades e Ciencias Sociais terán unha estrutura única. Non obstante, dentro de cada unha delas, a Consellería de Educación e Ordenación Universitaria poderá fixar bloques, cun máximo de tres materias, entre aquelas que configuran a modalidade respectiva, para o conxunto dos dous cursos.

7. O alumnado, no momento da súa inscrición para cursar bacharelato, deberá optar por unha das modalidades.

A Consellería de Educación e Ordenación Universitaria regulará as condicións nas que o alumnado que cursase o primeiro curso de bacharelato nunha modalidade poida pasar ao segundo curso nunha modalidade distinta.

As alumnas e alumnos poderán elixir entre a totalidade das materias propias da modalidade elixida. A súa elección só poderá estar limitada cando haxa un número insuficiente de alumnas e alumnos de acordo cos criterios que estableza a Consellería de Educación e Ordenación Universitaria.

Cando a oferta das materias quede limitada nun centro por razóns organizativas, a Consellería de Educación e O.U. poderá autorizar que poidan ser cursadas noutro centro educativo no réxime ordinario ou de ensinanza de adultos, en calquera das súas modalidades.

8. Os centros docentes que impartan bacharelato ofrecerán, como norma xeral, dúas das súas modalidades.

A Consellería de Educación establecerá o número mínimo de alumnas e alumnos necesarios para poder impartir cada unha das modalidades do bacharelato, sen menoscabo do principio de equidade na oferta educativa.

Artigo 6º.- Materias comúns

1. As materias comúns do bacharelato teñen como finalidade afondar na formación xeral do alumnado, aumentar a súa madurez intelectual e humana e avanzar naquelas competencias que favorezan a aprendizaxe ao longo da vida.

As materias de Lingua galega e literatura I, Lingua galega e literatura II; Lingua castelá e literatura I e Lingua castelá e literatura II; Lingua estranxeira I e Lingua estranxeira II son materias de aprendizaxes progresivas; requirirán a superación das de primeiro curso para seren avaliadas as de segundo curso.

2. *As materias comúns do 1º curso de bacharelato son:*

- Ciencias para o mundo contemporáneo
- Educación física
- Filosofía e cidadanía
- Língua galega e literatura I
- Língua castelá e literatura I
- Língua estranxeira I

3. *As materias comúns do 2º curso de bacharelato son:*

- Historia de España
- Historia da filosofía
- Língua galega e literatura II
- Língua castelá e literatura II
- Língua estranxeira II

Artigo 7º.- Materias de modalidade.

1. As materias de modalidade do bacharelato teñen como finalidade proporcionar unha formación de carácter específico orientada a un ámbito de coñecemento

amplo que desenvolva as competencias máis vencelladas con este, que prepare para estudos posteriores e favoreza a inserción nun campo laboral determinado.

2. As materias propias da modalidade de Artes son as seguintes:

a) Artes plásticas, deseño e imaxe

Primeiro curso

- Cultura audiovisual
- Debuxo artístico I
- Debuxo técnico I
- Volume

Segundo curso

- Historia da arte
- Técnicas de expresión gráfico-plástica
- Deseño
- Debuxo artístico II
- Debuxo técnico II

b) Artes escénicas, música e danza

Primeiro Curso

- Análise musical I
- Anatomía aplicada
- Cultura audiovisual
- Linguaxe e práctica musical

Segundo curso

- Artes escénicas

- Historia da música e da danza
- Literatura universal
- Análise musical II

3. *As materias da modalidade de Ciencias e Tecnoloxía son as seguintes:*

Primeiro curso

- Bioloxía e xeoloxía
- Debuxo técnico I
- Física e química
- Matemáticas I
- Tecnoloxía industrial I

Segundo curso

- Bioloxía
- Ciencias da terra e medioambientais
- Debuxo técnico II
- Electrotecnia
- Física
- Matemáticas II
- Química
- Tecnoloxía industrial II

As materias de Debuxo artístico I e Debuxo artístico II; Debuxo técnico I e Debuxo técnico II; Análise musical I e Análise musical II; Matemáticas I e Matemáticas II; Tecnoloxía industrial I e Tecnoloxía industrial II son materias de aprendizaxes progresivas; requirirase a superación das de primeiro curso para seren avaliadas as de segundo curso.

Existen materias de modalidade que precisan, para poder ser cursadas satisfactoriamente, de coñecementos previos, que se xustificarán, ben cursando as materias que corresponden, ben acreditando os coñecementos necesarios,

mediante o procedemento que estableza a Consellería de Educación e Ordenación Universitaria:

- Física de 2º precisa de Física e química de 1º.
- Química de 2º precisa de Física e química de 1º.
- Electrotecnia de 2º precisa de Física e química de 1º.
- Ciencias da terra e medioambientais precisa de Bioloxía e xeoloxía.
- Bioloxía de 2º precisa de Bioloxía e xeoloxía de 1º.

4. *As materias da modalidade de Humanidades e Ciencias Sociais son as seguintes:*

Primeiro curso:

- Economía
- Grego I
- Latín I
- Historia do mundo contemporáneo
- Matemáticas aplicadas ás Ciencias sociais I

Segundo curso:

- Economía de empresa
- Xeografía
- Grego II
- Latín II
- Matemáticas aplicadas ás Ciencias sociais II
- Literatura universal
- Historia de arte

As materias de Grego I e Grego II; Latín I e Latín II; Matemáticas aplicadas ás Ciencias sociais I e Matemáticas aplicadas ás Ciencias sociais II son materias de aprendizaxes progresivas; requirirásese a superación das de primeiro curso para seren avaliadas as de segundo curso.

5. O alumnado deberá cursar tres materias propias de modalidade en cada un dos cursos do bacharelato. Das seis materias de modalidade que se deberán cursar no conxunto dos dous cursos do bacharelato, polo menos cinco deberán ser da modalidade elixida.

6.- O alumnado que opte pola modalidade de Artes deberá cursar Cultura audiovisual en 1º e Técnicas de expresión gráfico-plástica en 2º, se elixiu a vía de Artes plásticas; deberá cursar Cultura audiovisual en 1º e Historia da música e da danza en 2º se elixiu a vía de Artes escénicas.

O alumnado que opte pola modalidade de Ciencias e Tecnoloxía deberá cursar Matemáticas I en 1º e Matemáticas II en 2º curso.

O alumnado que opte pola modalidade de Humanidades e Ciencias Sociais, deberá cursar Historia do mundo contemporáneo en 1º e Xeografía en 2º.

Artigo 8º.- Materias optativas

1. As materias optativas no bacharelato contribúen a completar a formación do alumnado en aspectos propios da modalidade elixida ou ampliando a propia formación xeral.

2. O alumnado cursará unha materia optativa tanto no primeiro como no segundo curso do bacharelato cunha carga lectiva igual á das materias propias de modalidade

3. Os centros docentes ofrecerán materias optativas en conformidade co que estableza a Consellería de Educación e Ordenación Universitaria, garantíndose que o alumnado poida elixir tamén como materia optativa unha materia de modalidade.

4. En calquera caso, na oferta de materias optativas ás que se refire o epígrafe anterior os centros ofrecerán obrigatoriamente: *segunda Lingua estranxeira*, *Tecnoloxías da información e comunicación* e *Música* que serán cursadas nun dos cursos, agás a segunda lingua estranxeira que poderá ser cursada nos dous cursos.

Artigo 9º.- Materias impartidas en lingua galega

1. No bacharelato impartiranse en galego as materias seguintes: *Filosofía e cidadanía e Ciencias para o mundo contemporáneo* en primeiro e *Historia da filosofía e Historia de España* en segundo, entre as materias comúns, e será completado con materias de modalidade das que serán impartidas en lingua galega as indicadas no artigo 7º.6 como materias que deberán ser cursadas obrigatoriamente nas modalidades respectivas.
2. Ademais das materias establecidas no epígrafe anterior, o claustro do profesorado dos centros educativos completará o número de materias que garanta que o alumnado reciba, polo menos, o cincuenta por cento da docencia en galego, como establece o artigo 10 do Decreto 124/2007 do 28 de xuño, polo que se regula o uso e promoción do galego no sistema educativo, e que figurará no Proxecto lingüístico do centro.
3. O bacharelato proporcionarlle a todo o alumnado unha boa competencia nas dúas linguas oficiais a fin de que repercuta, de forma positiva, no seu uso.

Artigo 10º.- Currículo

1. Enténdese por currículo do bacharelato o conxunto de obxectivos, contidos, métodos pedagóxicos e criterios de avaliación aplicados a estas ensinanzas.
2. Os centros educativos desenvolverán e completarán o currículo do bacharelato establecido no presente decreto. A concreción do currículo formará parte do proxecto educativo.
3. As actividades educativas no bacharelato impulsarán e favorecerán a capacidade do alumnado para aprender de maneira autónoma, para o traballo en equipo e para aplicar métodos de investigación apropiados á súa idade de formación.
4. A Consellería de Educación e Ordenación Universitaria promoverá as medidas necesarias para que nas distintas materias se desenvolvan actividades que estimulen o interese e hábito de lectura e a capacidade de expresarse correctamente en público, así como o uso das tecnoloxías da información e comunicación.

Artigo 11º.- Obxectivos, contidos e criterios de avaliación

Os obxectivos, contidos e criterios de avaliación que corresponden a cada unha das materias que conforman o bacharelato son os que se determinan no anexo I deste decreto.

Artigo 12º.- Distribución horaria

A distribución horaria que corresponde a cada unha das materias que constitúen o currículo do bacharelato é a que se establece no anexo II deste decreto.

Artigo 13º.- Avaliación

1. A avaliación da aprendizaxe será continua e diferenciada segundo as distintas materias e terá en conta os diferentes elementos que constitúen o currículo.
2. Será competencia do profesor ou da profesora de cada materia a decisión sobre a superación ou non, por parte do alumnado, dos obxectivos establecidos, tomando como referente fundamental os criterios de avaliación.
3. O alumnado que non supere algunha materia logo da avaliación final do período ordinario poderá realizar unha proba extraordinaria. A Consellería de Educación e Ordenación Universitaria determinará o calendario para a súa realización.
4. O equipo docente, constituído polas profesoras e profesores que imparten docencia a cada un dos grupos de bacharelato, coordinado pola persoa titora, valorará a evolución de cada alumna e cada alumno no conxunto das materias, a súa madurez académica en relación cos obxectivos do bacharelato así como, ao final da etapa, as súas posibilidades de progreso en estudos posteriores.
5. Se no proceso de avaliación continua se advertise que unha alumna ou un alumno non progresa adecuadamente, o centro educativo, tan pronto como detecte as dificultades de aprendizaxe, adoptará medidas de reforzo educativo coa finalidade de que o alumnado adquira as aprendizaxes necesarias para continuar satisfactoriamente os seus estudos.
6. O profesorado avaliará tanto a aprendizaxe do alumnado coma o proceso de ensinanza e a súa práctica docente.
7. Os resultados da avaliación expresaranse mediante cualificacións numéricas de cero a dez, sen decimais, considerándose negativas as inferiores a cinco. A nota media será a media aritmética das cualificacións de todas as materias, redondeada á centésima máis próxima e, en caso de equidistancia, á superior. Na convocatoria da proba extraordinaria, se o alumnado non se presentase a ela, consignarase como non presentado.

8. Os documentos oficiais de avaliación do bacharelato son o expediente académico, as actas de avaliación, o informe persoal por traslado e o historial académico. A Consellería de Educación e Ordenación Universitaria regulará os procedementos e os documentos necesarios para levar a cabo a avaliación do alumnado, así como a súa supervisión e custodia.

Artigo 14º.- Promoción

1. Ao finalizar o 1º curso, e como consecuencia do proceso de avaliación, o profesorado de cada alumna e cada alumno adoptará as decisións sobre a súa promoción ao 2º curso.
2. As alumnas e os alumnos conseguirán a promoción ao 2º curso cando superen todas as materias cursadas ou se teña avaliación negativa en dúas materias como máximo.
3. O alumnado que conseguise a promoción a segundo curso con materias avaliadas negativamente deberá cursalas ao longo do curso. Os centros educativos organizarán as actividades de recuperación e avaliación das materias pendentes.

Artigo 15º.- Permanencia dun ano máis no mesmo curso

1. O alumnado que non consiga a promoción ao segundo curso deberá permanecer un ano máis no primeiro, cursándoo de novo na súa totalidade se o número de materias avaliadas negativamente é superior a catro.
2. As alumnas e alumnos que non consigan a promoción ao segundo curso, e teñan tres ou catro materias avaliadas negativamente, poderán optar por:
 - a) repetir o curso na súa totalidade
 - b) cursar as materias de primeiro curso con avaliación negativa e completar con dúas ou tres materias de segundo curso que non coincidan no seu horario coas de primeiro curso suspensas. Estas materias de segundo curso en ningún caso pertencerán a aquelas que teñan igual denominación ou que inclúan coñecementos de materias de primeiro curso non superadas.
3. A matrícula e avaliación destas materias terá carácter condicional, sendo necesario estar en condicións de promocionar ao segundo curso nos termos

establecidos no epígrafe 2 do artigo 14º deste decreto, para que as ditas materias poidan ser avaliadas.

4. O alumnado que opte polo parágrafo b) do punto anterior, e que sexa menor de idade, deberá contar coa autorización dos seus nais/pais ou titores legais.

5. O alumnado que, ao finalizar o segundo curso, teña avaliación negativa nalgunha materia, poderá matricularse das mesmas sen necesidade de cursar de novo as materias superadas. A Consellería de Educación poderá regular as condicións nas que o alumnado poida asistir ás clases correspondentes ás materias superadas.

Artigo 16º: Titulación

1. Obterá o título de bacharel o alumnado que curse satisfactoriamente o bacharelato en calquera das modalidades. Este título terá efectos laborais e académicos.

2. Para obter o título de bacharel será necesario ter avaliación positiva en todas as materias dos dous cursos de bacharelato.

3. O alumnado que finalice as ensinanzas profesionais de música e danza obterá o título de bacharel se supera as materias comúns do bacharelato, de acordo co establecido no artigo 50.2 da Lei orgánica 2/2006, do 3 de maio, de educación.

Artigo 17º: Atención á diversidade

1. A Consellería de Educación e Ordenación Universitaria establecerá as medidas oportunas para que o alumnado con necesidades educativas especiais teña as condicións necesarias ao seu alcance para favorecer o seu acceso ao currículo do bacharelato.

2. A escolarización de alumnado con altas capacidades intelectuais, identificado como tal polo persoal cualificado para tal efecto, poderá flexibilizar a súa escolarización nos termos que estableza a Consellería de Educación.

Artigo 18º: Autonomía dos centros

Tal como queda establecido no artigo 10º.2 do presente decreto, os centros educativos concretarán o currículo, que será incluído no proxecto educativo. A dita concreción contará, polo menos, cos elementos seguintes:

- a) Contribución aos proxectos lingüístico, lector, de tecnoloxías da información e comunicación e ao plan de convivencia do centro.
- b) Decisións de carácter xeral sobre a metodoloxía.
- c) Criterios sobre a avaliación e promoción do alumnado.
- d) Liñas xerais de atención á diversidade.

Disposicións adicionais:

Disposición adicional primeira. Ensinanza de relixión

1. A disposición adicional segunda da Lei orgánica 2/2006, do 3 de maio, de educación establece as ensinanzas de relixión no bacharelato.
2. O alumnado maior de idade ou os seus pais/nais ou tutores legais mentres sexa menor decidirán sobre cursar ou non ensinanzas de relixión no momento de formalizar a súa matrícula. O alumnado que opte por non recibir ensinanzas de relixión permanecerá nos centros educativos e contará coa debida atención educativa.
3. O currículo da materia de relixión católica e das diferentes confesións relixiosas coas que o Estado español ten subscritos acordos de cooperación en materia educativa, será competencia, respectivamente, da xerarquía eclesiástica e das correspondentes autoridades relixiosas.
4. A avaliación da materia de relixión católica realizarase nos mesmos termos e cos mesmos efectos cá das outras materias do bacharelato. A avaliación doutras confesións relixiosas axustarase ao establecido nos acordos de colaboración en materia educativa suscritos con elas polo Estado español.

Coa finalidade de garantir o principio de igualdade e a libre concorrência, as cualificacións desta materia non computarán na obtención da nota media para os efectos de acceso á Universidade nin nas convocatorias para a obtención de

bolsas e axudas ao estudo nas que deban entrar en concorrancia os expedientes académicos.

Disposición adicional segunda. Ensinanzas de adultos

A Consellería de Educación e Ordenación Universitaria regulará a oferta do bacharelato ao principio de flexibilidade que rexe a educación das persoas adultas, tanto na modalidade presencial como a distancia, así como as probas correspondentes, de acordo co disposto no artigo 69.4 da Lei orgánica 2/2006, do 3 de maio, de educación.

Disposición adicional terceira. Ensinanzas impartidas en linguas estranxeiras

1. Os centros educativos poderán impartir algunha das materias do currículo de bacharelato nunha lingua estranxeira, dentro do programa de seccións bilingües. Esta decisión quedará expresada no proxecto lingüístico que forma parte do proxecto educativo de cada centro.

2. Os centros que impartan algunha materia en lingua estranxeira aplicarán en todo caso os criterios de admisión do alumnado establecidos de forma xeral, sen incluír criterios lingüísticos.

Disposición adicional cuarta. Correspondencia con outras ensinanzas

En tanto o Ministerio de Educación e Ciencia non estableza, con efectos para todo o Estado, o réxime de validacións entre materias de bacharelato e materias das ensinanzas profesionais de música e danza, así como os efectos que sobre a materia de Educación física deba ter a condición de deportista de alto nivel e rendemento, serán de aplicación as validacións vixentes.

Disposicións transitorias:**Disposición transitoria primeira. Aplicación da normativa**

No curso 2008-2009 implantaranse as ensinanzas correspondentes ao primeiro curso do bacharelato. No curso 2009-2010 implantaranse as correspondentes ao segundo curso, de acordo co disposto no Real decreto 806/2006, do 30 de xuño, polo que se establece o calendario de aplicación da nova ordenación do sistema educativo. Durante o curso 2008-2009 o 2º curso de bacharelato rexirase polo Decreto decreto 231/2002, do 6 de xuño, polo que se modifica o decreto 275/1994 (DOG do 15 de xullo de 2002), polo que se establece o currículo de bacharelato na Comunidade Autónoma de Galicia.

Disposición transitoria segunda. Validez do libro de cualificacións de bacharelato

Os libros de cualificacións de bacharelato terán efectos de acreditación, segundo o establecido na lexislación vixente, ata a finalización do curso 2007-2008.

Ao finalizar o dito curso, pecharanse mediante dilixencia oportuna e inutilizaranse as páxinas restantes.

Disposición transitoria terceira. Oferta de modalidades do bacharelato

Sen prexuízo do establecido no artigo 5º.7 deste decreto, os centros que na actualidade non viñan ofrecendo a modalidade de bacharelato tecnolóxico, non ofrecerán as materias de Electrotecnia e Tecnoloxía industrial I e II ata que contengan os recursos específicos para seren impartidas.

Disposición derogatoria

Decreto 275/1994, do 29 de xullo, polo que se establece o currículo do bacharelato na Comunidade Autónoma de Galicia (DOG do 31 de agosto de 1994)

Decreto 231/2002, do 6 de xuño, polo que se modifica o decreto 275/1994 (DOG do 15 de xullo de 2002).

Decreto 184/2003, do 20 de febreiro, polo que se modifica o Decreto 275/1994, do 29 de xullo, polo que se establece o currículo de bacharelato na Comunidade Autónoma de Galicia (DOG do 18 de marzo de 2003).

Orde do 2 de maio de 1996 pola que se publica a relación de materias optativas do bacharelato, establécese o currículo destas materias e se regula a súa oferta (DOG do 30 de maio de 1996).

Artigo 12º.5 do Decreto 133/2007, do 5 de xullo, polo que se regulan as ensinanzas da educación secundaria obligatoria na Comunidade Autónoma de Galicia (DOG do 13 de xullo).

Disposicións derradeiras:

Disposición derradeira primeira. Desenvolvemento normativo

Autorízase á conselleira de Educación e Ordenación Universitaria para ditar as disposicións que sexan necesarias para a execución e desenvolvemento do establecido neste decreto.

Disposición derradeira segunda.- Entrada en vigor

Este decreto entrará en vigor o día seguinte ao da súa publicación no Diario Oficial de Galicia.

Santiago de Compostela, ____ de _____ de dous mil oito.

Emilio Pérez Touriño
Presidente

Laura Sánchez Piñón
Conselleira de Educación e Ordenación Universitaria

ANEXO I

Introdución

Materias do Bacharelato

- 1-Ciencias para o mundo contemporáneo.
- 2-Educación física.
- 3-Filosofía e cidadanía.
- 4-Historia de España.
- 5-Historia da filosofía.
- 6-Lingua galega e literatura I e II.
- 7-Lingua castelá e literatura I e II.
- 8-Lingua estranxeira I e II.
- 9-Análise musical I e II.
- 10-Anatomía aplicada.
- 11-Artes escénicas.
- 12-Cultura audiovisual.
- 13-Debuxo artístico I e II.
- 14-Debuxo técnico I e II.
- 15-Deseño.
- 16-Historia da arte.
- 17-Historia da música e da danza.
- 18-Linguaxe e práctica musical.
- 19-Literatura universal.
- 20-Técnicas de expresión gráfico-plásticas
- 21-Volume.
- 22-Bioloxía.
- 23-Bioloxía e xeoloxía.
- 24-Ciencias da terra e medioambientais.
- 25-Electrotecnia.
- 26-Física.
- 27-Física e química.

28-Matemáticas I e II.

29-Química.

30-Tecnoloxía industrial I e II.

31-Economía.

32-Economía de empresa.

33-Grego I e II

34-Historia do mundo contemporáneo.

35-Latín I e II.

36-Matemáticas aplicadas ás ciencias sociais I e II.

37-Xeografía.

ANEXO II DISTRIBUCIÓN HORARIA

MATERIAS 1º CURSO	MÍNIMOS	PROPOSTA GALICIA
Ciencias para o mundo contemporáneo	2	3
Educación física	1	1
Filosofía e cidadanía	2	2
Lingua castelá	3	3
Lingua galega	-	3

Lingua estranxeira	3	3
Relixión	2	1
De modalidade	2 ¼ cada unha	3x4
Optativa	2 ¼	4
TOTAL	TOTAL	32
MATERIAS 2º		
CURSO		
Historia de España	2	3
Historia da Filosofía	2	3
Lingua castelá	3	3
Lingua galega	-	3
Lingua estranxeira	3	3
De modalidade	2 ¼ cada unha	3 x 4horas
Optativa	2 ¼	4
Relixión		1
TOTAL	TOTAL	32